

РЕСПУБЛИКАДИН
«150 ШКОЛА»
ПРОГРАММА
КЪБИЛИЗ АКЪУДЗАВА

Даш АЛИЕВ

30-июлдиз райондин активдин нубатдин совещание Ахцегь муниципалитетдин кылин заместитель Алмас Шуаеван регбервилик кваз кыле фена. Йикъан месэляяр раиж авурдалай ва алаатай совещанидин тапшуругъар (кылди къачуртIа, Дагъустандин Конституциядин йикъан серенжемар тешкилун, СП-рин сергъятра михивал хуыз алахъун, образованидин идараяр ремонтунив рикI гъаз эгечIун...) кыле тухузвай гъал ахтармишайдалай къулухъ ада гаф райадминистрациядин экономикадин отделдин начальник Мегъамед Касимоваз гана.

- Налогар къватIунин ирид вацран тапшуругъар районда эменнидай 100 далай артух ва чилин налогдай 120 процентдин кылииз акъуднава. Хъендик кваз къвалахзавай 183 кылдин карчи дуьздак акъуднава ва коммерциядин 114 объект (абуркай 26 райондилай къеце пата авайбуря) ГНИ-да регистрация хъувунва. Тахсиркар 36 касдилай делояр къайдаяр хуьдай органрив вуганва, - лагъана ада.

Йикъан 2-месэладай гаф райадминистрацияда крар идара ийизвайди тир Вадим Агъасиева къачуна. Ада къейд авурвал, РД-дин Закондив къурвал, 3 ва адалай гъаф аялар ва чпиз чилин участокдин игътияж авай хизанриз госуарство 300-2000 кв. метрдин чилин участокар гудайвал я. Гъавилий СП-рин кылеры чпин хуьрера гъахътин хизанрин сиягъар 1-августдалди Минюстдиз рекъе тунин лазимвал ава.

Муниципалитетда эцигунрин сад тир заказчикдин Управленидин (УСЕЗ) начальник Мусабек Гъажиев районда образованидин идараяр республикадин «150 школа» программдик кваз ремонтунин месэладай рахана. «Алай вахтунда Ахцегърин 2 ва 3 лагъай, гъакI Смугъулрин, Калукрин ва КъакIарин школяяр ремонтзава. Анра къуюяр, пищеблокар, чими туалатар, чиркин ятар ахвахдай фуарар тукъуьрзава, месела, 2-нумрадин СОШ-да къав дегишарзава ва икI мад. 1- сентябрдалди эцигунринни ремонтрин вири къвалахар бегъемарна, школяяр къелунин цийи йисаз тамавилелди гъазурда», - лагъана ада.

Совещанидал гъакI школяяр адетдин ремонтралди, яни ширкиреж яна, михъивилер авуна 1-сентябрдиз гъазурунин, Дагъустан рекъемрин телевиденидин шартIарал элячIзавайвилени (14-октябрдилай къулухъ куьгъне маркадин телевизор авайбурувай цифровый сигнал къаз жедач ва и месэладиз телевизор цийибурал эвезуналди, махсус приставкаярни антеннаяр къачуна акалуналди гъазурвал акуна къанда) ва йикъан важиблу бязи маса месэлайризни килигна.

Совещание Алмас Исмаиловича инал веревирд авур вири месэлайрай СП-рин кылеризни, райондин талукъ тир идарайринни карханайрин руководителриз тайин тапшуругъар гуналди ва авур къвалахдин нетижаяр къуналди куьтягъарна.



1928-йисалай акъатзава

12+

№31 (8688), арбе

ЩИШИ ДУЪНЪЯ

31-июль, 2019-йис. Газет гъафтада садра акъатзава.

Къимет 10 манат

ДИНДИН МЯРЕКАТ

КЪАКIА ШЕЙХ ЯРАГЪ МЕГЪАМЕДАН ТIВАРЦИХЪ МЕЖЛИС

Дашдемир ШЕРИФАЛИЕВ

27-июлдиз Ахцегъ райондин КъакIарин хуьре чIехи шейх Ярагъ Мегъамедан тIварцихъ диндин чирвилерин ва жегъилар уьмуьрдин сагълам къайдайрал, спордал желбунин мурал-метлебдин гурлу межлис хъана. Ам Ахцегъ райадминистрациядин, РД-дин милли политикадин ва диндин крарин рекъай Министертвонин изиндалди районда республикадин Муфтиятдин векил, Ахцегърин Жумья мискиндин имам Абдулашим Гъажидин куьмекчи Гъуснидин Гъажи Ашуралиева ва КъакIарин хуьруьн имам Уьзеир Гъажиди тешкилна ва кыле тухвана. Мярекатда РД-да милли политикадин ва диндин крарин рекъай Министрдин заместитель Мурад Шафиева, республикадин Духовный Управленидин векил, карчи Абдулатиф Дагъларова, Къиблепатак Дагъустандин са жерге районринни хуьрерин имамри, Махачкъала, Дербент шегъеррай атанвай мугъманри ва, гъелбетда, КъакIарин жемьтди иштиракна.



Межлис пакаман сятдин цудалай хуьруьн майдандал спортдин милли жуьрейрай (гъилер къун, цил чIугун, пугар хъажун, хъел-чIемерукрай лишанар къун...) акъажунар кыле тухунилай башламишна. Ниснинихъ лагъайтIа, вири иштиракчийриз кфетлу тIуьн-хуьн гана. Спортдин акъажунар сятдин ругудалди давам хъана ва гъедрехъ, сятдин иридаз абур вири СП-дин дараматдин вилик къвай ял ядай багъда диндин межлисдиз къватI хъхъана. Мярекат адан иштиракчийри саналди дуьа авуналди ва виридан развилелди йифен цудан зураз бегъем хъана.

- Гъурметлу къакIувиар, атанвай вири мугъманар, къе чна шейх Ярагъ Мегъамедан экуь къамат рикIел хуьн яз тешкилнавай межлис кез мубаракрай! - башламишна ихтилат мярекатдин тамада Гъуснидин Ашуралиева. - Къуй чи ватанда ислягъвили ва мублагъвили цуьк акъудрай! Къе парабуруз, гъайиф хъи, чи девлетлу тарих чизвач, жегъилриз диндин чарасуз чирвилер авач. И межлисин куьмекдалди чна гъа нукъсан тукъуьр хуьвунин кам къачуьза. Ихтилат кватай чкадал къейдин, и шикилдай аквазвайди Кавказда мюридизмдин бине эцигай зурба алим, Дагъустандинни Чечнядин имамрин руьгъдин регбер Мегъамед эфенди Ярагъи я.



Мугъаммадаз гуьза, яшдиз гъевчи ятIани, дережадиз ам пара чIехи я... Хуралай еке устадвилелди Каламдин суаряр къелайдалай къулухъ ва ахпа вазеринни суьгъбетрин арайра майдан Махачкъаладай

атанвай Надият Абдурагъмановадин гъилик къвай аялрин «Хайрат» дестедин ва мавлид къелзавай жегъилрин ихтиярда твазвай. Абурун ширин сесерин маналу нашидри межлисин иштиракчийр гъейранарзавай.

Микрофондихъ Сулейман Стальский райондин имам, чи дин ва чIал хуьзвай «Ассалам» газетдин кылин редактор Гъасан Гъажи Амаханов атана.

- Диндин чирвилерикай ихтилат физвай ихътин мярекатар суваблур я. Къуръанда чаз «икъра», яни къела лугъуьза. Алимар пайгъамбаррин варисар яз, гъабурини чун дуьз рекъе твазва. «Гар са тухумдиз са алим хуьй» - лугъудай бубайрин мисал ава. Инсан къейила, адз анжах пуд шей амуькъзава: чирвилер авай хъсан велед, куьтягъ тежер садакъа (рехъ-хвал... тукъуьрункди жезвай) ва вичи несилриз тазвай чирвилер. Гъавилий алимривай къелна дуьз чирвилер къачун чи везифа ва буржи я...

- Эхиримжи вахтунда республикадин руководствонин куьмекдалди РД-дин Муфтиятди чкайрал жегъилрин арада диндин, эдеб-ахлакъдин ва спортдин серенжемар кыле тухуниз гъакъикъатдани еке фикир гуьза, - лагъана шаз республикада тухвай кадрийрин резервдин конкурсдин гъалибчи, Дагъустанда милли политикадин ва диндин крарин рекъай Министрдин заместитель, къакIуви Мурад Шафиева. - Къе хуьре яргъи югъди жегъилар и крарал желбунин муралдалди мярекатар тешкилай ва абур иштираккай куьн вири сагърай! Чи бубайрин адетрин Исламдин кыле тухунин карда инсанриз са манивални авач, я бубайрин диндихъбай, Жумья мискинди капI авунихъбай ва жуван аялриз диндин чирвилер гуьнин карда регъуьни хъана виже къведач. Къез чидатIа, Махачкъаладин кылин майдандал алай мискинди Гъукуматдин дережадин чиновникрини ибадат ийизва. Кылинди, чи ният-фикирар михъибур хъана къанда...

Межлисдал жемьтдин вилик насигъатрин келимаяр гъаз Усугъчай хуьруьн имам Алихан Гъажи, Дербентдай атанвай Нурудин Гъажи ва маса юлдашар экъечIна. Межлис кыле тухузвайди тир Гъуснидин Ашуралиева и юкъуз тешкилай спортдин серенжемрин нетижаяр къуна ва 1, 2, 3-чкаяр ккур ксар талукъ тир дережайрин Грамотайриз, медалриз ва пулдин премийриз лайихлу авуна. Эхирдай хуьруьн имам Уьзеир Гъажиди диндин жегъил тухуз куьмек гунай ва адан серенжемра активнидаказ иштиракунай хуьруьнвийриз, мугъманриз чухсагъул малумарна.

Къуй Аллагъди и межлис къабулрай, адан суваб-берекат себеб яз КъакIарин хуьре, вири районда гъурмет, секинвал, берекат артух хуьрай! Амин!

ПРОДУКТРИН ЗИНБИЛДИН КЪИМЕТ ХКАЖ ХЪАНВА

Дагъустан Республикада недай суьрсетдин къватIалдин шартIунин (агъа къанин) къиметди июндин эхирда юкъван гъисабдалди 4112 манат тешкилна. Республикадин Госстатистикадин органдин делиралди, йисан эвелдилай адан къадар 4,7 процентдин артух хъана. Гъа икI, Дагъустанда и рекъем СКФО-дин регионрин арада вичин чIехивилиз килигна къвед лагъай чкадал акъатна.



Суьрсетдин виридалайни багъа къватIал Ставрополдин крайда, виридалайни ужуьди лагъайтIа, Кабардино-Балкарияда къейднава. Гъар са инсандин вацран суьрсетдин агъа къанин къадардик саки 15 кг. фу ва чIахар, 12,5 кг. картофар, 11,5 кг. емишар ва кондитервилин шейер, саки 3 кг. як, 1,2 кг. балугъ, 18 кг. некдедин продуктар акатзава.

РАЙОНДИН ПРОКУРАТУРАДИ ХАБАР ГУЗВА ИСТЕМИШУН РАЗИ АВУНА



Мукъвара райпрокуратуради тухвай ахтармишунин нетижада тайинарнава хъи, «Мегъарамдхуьр-Ахцегъ-Рутул» авторекъе яд гъатункиди ва Самур вацIу диб къакъудуникди Хуьруьгърин хуьруьн патавай къейднавай рекъин тайин участокдин саки са пай чIланва. Идахъ галаз алакълу яз райондин прокуратуради Махачкъала шегъердин Советский райондин суддиз талукъ тир Министерство ва РД-дин авторекъерин Управление рекъин и участок къайдадиз хъуниз мажбурунин патахъай искдин арза рактурна. Судди райпрокуратурадин искдин истемишун тамавилелди рази авуна.

